

5. 4. 1977

128 27

En memoria da

## Sofia Cavegn-Gieriet, Sedrun

(Corr.) Ils 11 da mars 1977, in venderdis da cureisma, ei la Sofia Cavegn morta el spital a Glion. In venderdis-cureisma. Temps che nus cristifideivels fagein la via dalla crusch e patergein vid la passiun e mort da Niessegner. — Era en la veta dalla Sofia ha ei dau dis dalla via dalla crusch, onns da malsogna e da pitir. Denton en bien spért da cardientscha ed en ferventa oraziun ha ella adina puspei anflau la forza da surportar cruschs e travaglias cun pazienzia e sefidond sin Diu. Cunzun ils davos dis el spital ein stai dis sin la via dalla crusch. Ussa, suenter la 14avla staziun, ha ella astgau ir en en la gloria dil Segner.

Naschida ei la Sofia aunc en tschei tschentaner, ils 14 da matg 1899, sco feglia da Rest Antoni Gieriet e Barla Catrina, nata Monn. En la sulegliava casa paterna, sisum Gonda, ha ella passentau bials onns d'affonza e da giuentetgna, ensemble cun 3 frars e 4 soras. Segir fuva ei da luvrar fetg en la gronda truscha dil passiunau pur Rest Antoni Gieriet, denton carezia e beinvluientscha vicendeivla mantenevan ventira e cumentienttscha en casa e famiglia. In avantatag ha la Sofia forsa giu aschilunsch ch'ella fuva la pintga ed ha buca stuiu sefierer aschi spert en la lavur sco ils fargliuns pli vegls. En il «Glogn» da 1933 anflein nus duas fotografias, fatgas entuorn 1912, che representan la famiglia da Rest Antoni Gieriet tier la lavur da trer ora glin oragiudem ils plauns da Sedrun.

Maridada ei la Sofia 1928 cun Albert Cavegn ed els ein secasai a Sedrun en la casa gronda sper il plaz Cadruvi. Da sia cuschina anora havess ella giu buna caschun dad observar tgei che curreva e passava sin via e sin Cadruvi, denton persuerter haveva la Sofia ni marveglias ni peda. La gronda lavur en la casada cun 7 affons schava buca temps per s'empitschar dils fatgs dils auters. A 9 affons ha quella mumma schen-ghegia la veta, 2 ein morts aunc da pign. La primavera 1944 ei il Placi, in buob da 10 onns, sedisgraziaus mortalmein, curdond en l'aua dalla val Strem. Quella frida ha tuccau sco ina spada



da dolur il cor dalla mumma. La Sofia ha giu la medema sort sco sia mumma, la Barla Catrina, ch'ha stuiu bargir bia larmas, cu siu fegl Toni fuva curdaus el vadretg en la val Milar. Unfrendas ch'ils prighels en la veta da pastur han pretendiu inaga ni l'autra. — Gia 1962 ha la Sofia stuiu deplorar la mort da siu consort, igl Albert.

Suenter che ses fegls han giu bandunau stiva e casa paterna e fundau atgnas famiglias, ha la Sofia aunc saviu passentar zacons bials onns en sia tgeua stiva e sia feglia Nesa ha giu bien quitau dad ella. En il program dil di fuvan reservadas certas uras per ir a messa, a rusari, far ina viseta sin santeri sco era per far oraziun a casa. Aschia ein quels onns buca stai vits, mobein fritgeivels da merets per questa e per l'autra veta. Cun prest 78 onns eis ella vegnida sin ina biala vegliadetgna. — Cristus seigi ussa ad ella glisch e beadianscha! tb